

საქართველოს ხელსაწყოთმშენებლობის ფლაგმანი „ანალიზხელსაწყო“ 60 წლისაა !

2016 წელს საქართველოს ტექნიკური უნივერსიტეტის სამეცნიერო, სასწავლო და საწარმოო ცენტრის „ანალიზხელსაწყო“ დაარსებიდან 60 წელი შესრულდა !

1956 წელს საქართველოს მთავრობის გადაწყვეტილებით შეიქმნა ავტომატიზაციისა და ხელსაწყოთმშენებლობის დარგის მთელი რიგი ორგანიზაციები რესპუბლიკის სხვადასხვა ქალაქებში. თბილისში, სოხუმში, ქუთაისში, გორსა და რუსთავში ჩამოყალიბდა სამეცნიერო, კვლევითი, საკონსტრუქტორო და ტექნოლოგიური ინსტიტუტები და ბიუროები. ახლადშექმნილი ორგანიზაციებიდან თბილისის ხელსაწყოთმშენებლობისა და ავტომატიზაციის საშუალებათა სპეციალურმა საკონსტრუქტორო ბიურომ თავიდანვე გამორჩეული, მოწინავე პოზიციები დაიკავა.

1974 წელს საკონსტრუქტორო ბიუროს ბაზაზე ჩამოყალიბდა უდიდესი სამეცნიერო-საწარმოო გაერთიანება „ანალიზხელსაწყო“, რომელიც აერთიანებდა ანალიტიკური ტექნიკის თბილისის საცდელ ქარხანას, გორის სამეცნიერო კვლევით ინსტიტუტსა და საცდელ ქარხანას, ქუთაისის ხელსაწყოების საკონსტრუქტორო ბიუროს და თბილისის ტაქომეტრიის ტექნოლოგიურ ბიუროს. მოგვიანებით გაერთიანებას შეუერთდა თბილისის ქარხნები „თბილხელსაწყო“ და „თბილჰიდრომეტხელსაწყო“. გაერთიანების მეთაური ორგანიზაცია გახდა ანალიტიკური ტექნიკის საკავშირო მნიშვნელობის სამეცნიერო კვლევითი ინსტიტუტი.

სამეცნიერო-საწარმოო გაერთიანება „ანალიზხელსაწყო“ პირველი გენერალური დირექტორი იყო ტექნიკის მეცნიერებათა დოქტორი, ზაურ ყრუაშვილი, რომელიც ამავე დროს გახლდათ საქართველოს პოლიტექნიკური ინსტიტუტის „მართვის ავტომატიზებული სისტემების“ კთედრის პროფესორი (სურ.1).

„ანალიზხელსაწყო“ გაერთიანებაში მუშაობდა რამდენიმე ათასი ადამიანი: მეცნიერ მუშაკები, სპეციალისტები, ტექნიკოსები და მაღალკვალიფიციური მუშები. მიღწეულ იქნა მეტად მნიშვნელოვანი შედეგები ანალიტიკური ხელსაწყოების, მოწყობილობებისა და სისტემების შექმნაში, წარმოებასა და დანერგვაში როგორც საქართველოში, ასევე მაშინდელი საბჭოთა კავშირის ყველა რესპუბლიკაში და საზღვარგარეთის ქვეყნებში: გერმანია, უნგრეთი, პოლონეთი და ჩეხოსლოვაკია.

**ჟურნალის რედაქცია გულთბილად ულოცავს
„ანალიზხელსაწყო“ თანამშრომლებს ღირშესანიშნავ
თარიღს და უსურვებს მათ წარმატებებს !**

ჟურნალის უახლოეს ნომერში გამოქვეყნდება საწარმოო გაერთიანების გენერალური დირექტორის, ბატონი თამაზ მაგანიას სპეციალური სტატია, რომელიც მიემდგვნება ჩვენს ქვეყანაში ხელსაწყოთმშენებლობის მდგომარეობასა და საქართველოს ტექნიკური უნივერსიტეტის სამეცნიერო, სასწავლო და საწარმოო ცენტრის „ანალიზხელსაწყო“ განვითარების პერსპექტივებს.



ზაურ ეგეშვილის ძე ყრუაშვილი დაიბადა 1932 წლის 6 ოქტომბერს ამბროლაურის რაიონის სოფელ ხოტევში. 1956 წელს დაამთავრა მოსკოვის მეტალურგიული ინსტიტუტი და მუშაობა დაიწყო ქ. რუსთავის ავტომატიზაციის საპროექტო ინსტიტუტში. 1968 წელს დაინიშნა სამეცნიერო საწარმოო გაერთიანება „ავტომატმრეწვის“ გენერალურ დირექტორად. 1977 წლიდან მთავრობის გადწყვეტილებით იგი სათავეში ჩაუდგა სამეცნიერო-საწარმოო გაერთიანებას „ანალიზხელსაწყო“, სადაც მოღვაწეობდა სიცოცხლის ბოლომდე.

ბატონი ზაური იყო ტექნიკის მეცნიერებათა დოქტორი, საქართველოს მეცნიერებათა აკადემიის ნამდვილი წევრი, ინფორმატიზაციის საერთაშორისო აკადემიისა და საქართველოს საინჟინრო აკადემიის აკადემიკოსი. მას გამოქვეყნებული ჰქონდა 200-ზე მეტი სამეცნიერო ნაშრომი. იგი 60 გამოგონების ავტორია. იყო რესპუბლიკის დამსახურებული ინჟინერი და გამომგონებელი.

აკად. ზ. ყრუაშვილი 1975 წლიდან შეთავსებით იყო საქართველოს პოლიტექნიკური ინსტიტუტის „მართვის ავტომატიზებული სისტემების“ კათედრის პროფესორი. მან დიდი წვლილი შეიტანა ახალგაზრდა ინჟინერ-სისტემოტექნიკოსების აღზრდისა და განათლების საქმეში. აკადემიკოს ზ. ყრუაშვილისა და აკადემიკოს გ. ჩოგოვადის („მას“ კათედრის პირველი გამგე 1972-1980 წწ) ხელშეწყობით შესრულდა არაერთი მნიშვნელოვანი ერთობლივი სამეცნიერო-ტექნიკური პროექტი.



სურ.1. კათედრაზე 1977 წ. სხედან აკადემიკოსები ზაურ ყრუაშვილი და გოჩა ჩოგოვაძე, პროფესორი ვაჟა დიდმენიძე